

## 81.—HE ORIORI MO TE RANGITUMUA.

*Na TE MOTU. (Ngati-Kahungunu.)*

Ko te korero o te haerenga mai o Mahu i Nukutaurua ki a Taewha-a-rangi i Maungawharau (kei te taha moana o Here-taunga) ki te kimi i te ara e haere ai te tangata ki te pouriuri, ki te potangotango, ki tua o Paerau, oti atu mo te tahaetanga i ta raua kumara ko tona wahine ko Te Atinuku, kua taia ki te Journal o te Polynesian Society ki te reo Maori, ki te reo pakeha. (J. 8/122, 8/133, 35/73). Ko nga tohunga nana i korero ko Takanini Tarakawa raua ko Paora Ropiha, ko Te Matorohanga; na Percy-Smith raua ko Elsdon Best i whakapakeha, a na raua hoki i whakawhaiti nga whakamarama mo nga tikanga nunui o taua korero.

Otiia kaore he kupu e ahu ana ki te whakaatu ko wai a Te Motu, e kiia nei nana tenei oriori, a ko wai hoki a Rangitumua mona nei tenei oriori. Koia i taia ai te waiata nei ki konei hei huarahi mai mo nga whakamarama a nga mea e mohio ana.

I moe a Taewha (ki etahi ko Taewa, engari e ki ana a Te Matorohanga ko Taewha-a-rangi te mea tika) i a Makaweroa (Mawakeroa ki etahi). Ki etahi korero i eke mai a Taewha i runga i a Takitimu. E kiia ana ko ia te tino tohunga o nga tohunga katoa i whakawhiti mai nei i Hawaiki, a i pau katoa i a ia te wananga o Hawaiki; ko ia te puna o nga karakia, o te makutu. Ko nga korero mo te take mai o Mahu kei te taupatupatu, engari ko Te Mahu o te korero nei i noho ki Nukutaurua. i te Mahia; ko Parinui-a-te-Kohu tona kainga. Ko te kaupapa o te waiata nei i taia ki raro nei kei te pukapuka a te Raka (S.L. 102).

Refs.: M.351, S.L. 102, J. 8/127, 8/133, 35/73.)

Rangitumua e noho<sup>2</sup> mai ra  
I te kahika a Hineruirae<sup>3</sup> e i,  
Tenei au nei, e tama, kai te kimi noa  
Kai te rapa noa i aku mahara.  
Kaore nei, e tama, te rahui<sup>4</sup> tangata i a taua;  
Ka ngaro<sup>5</sup> ra i te wa ki o matua, ki o tipuna  
Hei whakarahi atu mohou te marae i waho ra.  
Ka ngaro ra ia te wa ki to tuakana,  
Nga whakaruru hau o Tini raua ko Mano;  
Ka riro<sup>6</sup> ra ia i runga i nga hanga a Kaikomako<sup>7</sup>.  
I te kapukapu, i te kaunoti, i nga hanga a Mahu<sup>8</sup>  
I haramai ai ki te rangahau i a Taewa.<sup>9</sup>  
Ka poronga<sup>10</sup> i reira, koia Kurapatu<sup>11</sup>.  
Ka puta ana pori,<sup>12</sup> ka tau<sup>13</sup> ia i tana tau  
I a Marewa-ki-te-po, e he!  
Ka nonoho mai ai kia tau ki raro ra.  
Koia te kai<sup>15</sup> whakatutu  
E noho mai nga hiwi ki Kohuipu<sup>16</sup> ra.  
No te hokinga mai ka waiho<sup>17</sup> i te hamuti  
Ko Tuwhakarongomina;  
Na ka mate i reira ko Haereatautu,  
Te ngakinga o tona mate i Upokotaua<sup>18</sup> e.